

Visoki predstavnik pred VS UN-a: Maksimalan kapacitet za pozitivne promjene



Međunarodna zajednica ima obavezu da pomogne snagama pozitivnih promjena u Bosni i Hercegovini da do maksimuma iskoriste svoje kapacitete, izjavio je danas visoki predstavnik Valentin Inzko pred Vijećem sigurnosti UN-a.

U svom polugodišnjem obraćanju ovom tijelu UN-a, visoki predstavnik je naglasio da iako politika okrenuta ka prošlosti još uvijek ima snagu da izvrši negativan utjecaj, u Bosni i Hercegovini je “svakim danom sve jača snaga ljudi koji su okrenuti ka budućnosti.” On je rekao da međunarodna zajednica mora dati sve od sebe “da pomogne BiH da iskoristi priliku koju joj je dala EU, kako bi 2015. ostala zabilježena kao godina u kojoj se Bosna i Hercegovina odlučno okrenula ka budućnosti.”

“Dešavanja u narednih šest mjeseci će imati veoma važnu ulogu i utjecaj na način na koji će građani Bosne i Hercegovine gledati na dvadesetu godišnjicu Daytonu”, rekao je visoki predstavnik.

“Mir je, naravno, neprocjenjiv. I nikada ga ne treba uzimati zdravo za gotovo. Ali, on predstavlja osnovno polazište, a ne završetak puta. Potpuno je ispravno da dvadeset godina nakon rata građani Bosne i Hercegovine, posebno mladi ljudi, očekuju daleko više od svoje zemlje i njenih političara”.

“Ako se u predstojećim sedmicama i mjesecima bude vrijedno radilo i ako se ostvare rezultati, onda ćemo moći gledati ka budućnosti sa stvarnim optimizmom”, rekao je visoki predstavnik. “U Bosni i Hercegovini ima političara i ljudi koji žele da rade zajedno, s dobrim namjerama, kako bi zemlja krenula naprijed. Oni moraju dobiti našu punu i proaktivnu podršku.

[*Kliknite ovdje*](#) za cijeli govor visokog predstavnika.